

Schutzengel, gibt 's de?

Mit de Schutzengeln is des währlich a G'frett!
Ma kánn s' net berühren und a seg'n tuat ma s' net!
Wås áalso is dánn ám Schutzengel drán?

Mánchmál tántzt er áls „Zuafáll“ án.
Dánn kummt er wieder áls Freind um 's Eck
und nimmt dir a Träne, a Sorge weg.
Mánchmál fiert er dir in áller Ruah
die Liebe, vielleicht gár die große, zua?
Dánn fliagt er áls guade Idee umánand,
oder geht dir mit aner Lösung zur Hánd.
Mánchmál kummt er als Wárnung verkleidet,
damit ma hiheat und liaber vermeidet,
wås a'm verlockend vor Augen schwebt
und wås ma, in Unkenntnis, vielleicht erstrebt.
Mánchmál hót er dei Stimmung auf
mit der Hüf' von an Freind, und du kummst net drauf,
dass dá a Schutzgeist dahinter steckt,
der wáhrscheinli a damit wås bezweckt!
Mách deine Augen und d' Uhrwaschl'n auf!
Nimm Umwege jedenfálls ruhig in Kauf,
weu oftmáls, - dá steckt a Erfahrung drin -,
fiehren Umwege direkt zum Wunschzü hin!
Mánchmál legt er si áber a quer
und wü dir zagen, dass `s g'scheider wár',
des gár net z' máchen, wås du grád woit'st,
oder endli des z' tuan, wást' d' längst soit'st.

„*Mir hát er nia g'holfen*“, redt aner drei!
A Schutzengel kánn ka Versicherung sei!
Er zagt sie dir net nur so áls Beweis!
Er agiert im Hintergrund hamli und leis'.

Es *kumman* a'm Zweife, des is ka Frág',
wánn im Leben oft nix weider gehen mág,
wánn a Schicksálsschläg nách 'm ándern kummt,
wánn a'm ölend is und der Schádl brummt.

Wárum er net wárnt, Gefáhren vermindert,
an Unfáll vermeidt, Verbrechen verhindert,

hüft, wo Hüfe so Not tuan tat?
Dafir håt der Mensch ka Erklärung parat!
Mit vülem - er höfert währscheinli gern,
muass jeder von uns allan fertig wern!

Vielleicht redt er zu dir – gånz direkt,
und du bist nur zu beschäftigt – und herst eam net?